

అపొస్తలుడైన పౌలు గలతీయులుకు రాసిన పత్రిక **అపొస్తలుడైలా పౌలు గలతీయులుకు రాసిన పత్రిక** **అగరో కొతా**

యెడ పౌలు ద్వారాగా గలతీయులుకు రాసిలా పుస్తకం. సాకిరాక యెడ గలతీరె రొల్లా నంగాలుకు 48-57 బొచ్చురోనె మొజిరె కలొరె క్రీస్తు జొర్నెలా తర్వాతరె రొల్లా ప్రజానెకు పౌలు రాసిలా ఉత్తరం. సాకిరి బులి కచ్చితంగా కొయినారొ, సాకిరాక గలతీ ప్రజానె రోమా సామ్రాజ్యంరె రొల్లా గలతీయులుకు రాసిలాట. ముక్యముగా పౌలు యే ఉత్తరంకు ఎవెను పట్టుము తీకిరి ఇంకా కొరంతీ పట్టుం తీకిరి రాసిసి.

అపొస్తలుడైలా పౌలు గలతీరె రొల్లా పురువురొ ప్రజానెకు ఇంకా యూదా ప్రజానె గురించి, యూదునె నీలా ప్రజానె గురించి రాసిలీసి. పౌలు మరి ముక్యంగా సారొ బోద గురించి ఇంకా యూదునె నీలాలింకె యూదులంపరె తిరుగుబాటు గురించి, సాకిరాక పుర్ననిబందనరె క్రీస్తు ప్రజానె యూదునెరొ దర్మసాస్త్రం అనుసరించికిరి నలుగువురొ గురించి, సాకిరాక సున్నతి సంగతి గురించి రాసిసి. ఈనె పౌలు సువార్తకు ప్రకటించువురొ వల్లరె మాత్రమాక రక్సన పొందిగిమ్మొబులి సాకిరాక క్రీస్తుయేసురె రొల్లా నమ్మకముద్వారాగ మాత్రమాక 2:16 యెడ ప్రజానె కొరిలా పైటికి పురువు ప్రతిపలంకు దయకు దిగదీసి.

సంగతీనె

1. పౌలు గలతీయ సంగస్తులుకు దండము బులి పత్రికకు ప్రారబించిసి 1:1-5
2. పౌలు తా గురించి ఇంకా సెయ్యె దర్మసాస్త్రం ఆదారం కొరిగీకిరి జీవించిలించి బులి కొయికుంట తా అర్హత గురించి కొయివురొ 1:6-2:21

3. పాలు రక్తసరే దర్మసాస్త్రం క్రుపరొ ప్రాముక్యత కొయివురొ 3-4
4. పాలు బొట్ట క్రైస్తవులురొ జీవినవిదానం గురించి పాటించిల కుండె సలహాలు దివురొ 5:1-6:10
5. చివరగా పాలు పొదరె ఆచరించిలా సున్నతి బుల్లా నియమాలుకన్నా పురువు తాకు నో మనమ గా మార్చిలా సంగతికి గేపకం కొరిగి బులికిరి దండము సంగరె ఉత్తరముకు ముగించువురొ. 6:11-18

¹ మనమానె ద్వారా నీకుంటా కే మనమ సంగరె ఈనన్నా నీకుంటా యేసు క్రీస్తు ద్వారాగ, తాకు మొరిజిల్లాలింకె బిత్తరె తీకిరి సజివంగా ఉడదిల్లా బో ఈలా పురువు ద్వారాగా అపోస్తలుడుగా డక్కిగిల్లా పాలు బుల్లా మియ్యి,

² ఈనె మో సంగరె పాటు తల్లా విస్వాసులల్లా గలతీయ ప్రాంతంరె తల్లా సంగాలుకు సుబాలు కొయికిరి రాసిలా వినయొనె.

³ బోయాలా పురువు తీకిరి అం ప్రబువైలా యేసు క్రీస్తు తీకిరి తొముకు క్రుప, సాంతి కలిగిమాసి.

⁴ అం బోయాలా పురువురొ ఇన్తం ప్రకారం క్రీస్తు అముకు ఉంచినె తల్లా దున్తకలో తీకిరి చొడిపించిమాసిబులి అం పాపోనె కోసం తాకు సెయ్యాక ఒప్పుకొయిగిచ్చి.

⁵ పురువుకు సొబ్బిబెల్లె మహిమ కలిగిమాసి. ఆమేను.

ఇంగుటె సువార్త నీ

⁶ క్రీస్తు క్రుప ద్వారా తొముకు డక్కిలాటకు సడదీకిరి, ఇంగుటె సువార్త ఆడుకు తొమె ఎత్తో బేగా బుల్లికిరి పొలిజెవురొ దిగితన్నే మెత్తె బడే ఆచ్చర్యం కలిగిలీసి.

⁷ అసలు “ఇంగుటె సువార్త బుల్లాట నీ,” ఈనె క్రీస్తు సువార్తకు వక్రీకరించికిరి తొముకు గలిబిలి కొరిలాలింకె వొదిలింకె అచ్చె.

⁸ ఈనె అమె తొముకు ప్రకటించిలా సువార్త నీకుంటా ఇంగుటె సువార్తకు అమె యానెను పరలోకం తీకిరి అయిలా దేవదూతన్నా తొముకు ప్రకటించినె, సెయ్యె పురువురొ నరకసిక్కుకు జోసి.

9 సాకిరాక అమె అడకగరె కొయిలాపనికిరాక ఉంచినంకా ఇంకా కొయిలించొ. తొమె అంగీకరించిలా సువార్త నీకిరి ఇంగుటె కేస్తైనా ప్రకటించినె, తాకు పురువు నరకసిక్కుకు పాత్రుడు.

10 ఉంచినె మియి మనమానొ మెప్పుకు కోరిగిల్లించినా? నోనె పురువురో మెప్పుకు కోరిగిల్లించినా? మియ్యి మనమానుకు సంతోసపర్చిమాసి బులిగిన్నే క్రీస్తుకు దాసుడు ఈనారంత.

పాలు అపోస్తుడుగా క్యాకిరి ఈసి

11 మానే బయినె, మియ్యి ప్రకటించిలా సువార్త మనమానె ద్వారా అయిలాటనీబులి తొముకు తెలిసిమాసి.

12 మనమ తీకిరి మియ్యి సడకు పొందిలానియ్యి, మెత్తె కేసే సడకు బోదించిలానింతె, యేసు క్రీస్తాక స్వయంగా మెత్తె బయలుపర్చిసి.

13 మో అగరో యూదామత జీవితం గురించి తొమె సునిసా. మీ పురువురో సంగముకు గోరంగా హింసించుకుంటా నాసనం కొరుకుంటా రొయితమ్మి.

14 సెత్తెలె మెత్తె మో పూర్వికులురో సాంప్రదాయాలంపరె బడే ఆసక్తి తవ్వి. యూదా మత నిష్ఠ వినయంరె మో సొంత జతి మనమానె మో ఈడు కలిగిలా బడేలింకు మించిజేంచి.

15 ఈనెను మా పెట్టారె మెత్తె ప్రత్యేకపరిచిగీకిరి, తా క్రుప సంగరె మెత్తె డక్కిలా పురువు మీ యూదునెనీలాలింకు తా పో గురించి ప్రకటించిమాసి బులి

16 సెయ్యె తాకు మో బిత్తరె బయలుపరిస్తే ఇస్టపొడిసి. సెత్తెలె ఎంట్రాక మీ సలహా కోసం యూదునె సంగరె సంప్రతించిలానీ గని బో నిర్ణయించిలా పోరో సువార్త ప్రకటించితె పొదరెలింకె పక్కాక జేంచి.

17 మో కన్నా అగరె అపోస్తులైలాలింకు పక్షైనా, యెరూసలేముకైనన్నా జెల్లానీ, అరేబియా దెసాకు జేకిరి సే తర్వాతరె దమస్కు పట్నంకు బుల్లికిరి అయించి.

18 తింట బొచ్చురో ఈలాబెల్లె పేతురుకు పరిచయం కొరిగిమ్మాసి బులి యెరూసలేముకు జేకిరి తా పక్కరె పదిహేను దినొనె అచ్చి.

19 తాకు తప్ప అపోస్తలునెరె ఇంకా కాకూ మీ దిగిలాని, ప్రబువురొ బయి యాకోబుకు మాత్రం దిగించి.

20 మీ తొముకు రాసితల్లా యే సంగతినె గురించి పురువు అగరె నుచ్చిలానీ.

21 సే తర్వాతరె సిరియా, కిలికియ ప్రాంతమూనెకు అయించి.

22 క్రీస్తురె తల్లా యూదయ సంగంలింకు మో మూ పరిచయం నీ. ఈనె

23 “అగరె అముకు హింసించిలాట సెయ్యె అగరె పాడుకొరితందుకు అయిలాట మతముకు ప్రకటించిలీసి” బుల్లా సంగతి మాత్రమాక సునికిరి,

24 తంకె మో ద్వారా పురువుకు మహిమ పర్చినె.

2

పౌలుకు అపోస్తలునె అంగీకరించువురొ

1 వద్నాలుగు బొచ్చురోనే ఈలా తర్వాతరె మీ తీతుకు దరిగీకిరి బర్బుబా సంగరంకా యెరూసలేముకు బుల్లికిరి జేంచి.

2 అమె జెమ్మాసి బులి పురువు సొప్పొరె కొయిలందరాక జేంచి. మో ప్రయాస వ్యర్థమైజెల్లికివో బులి, నీనే వ్యర్థమైజేసి కివో బులి మీ పొదరెలింకు ప్రకటించితల్లా సువార్త కోసం విస్వాసులై ముక్యమైలా నాయికులుకు ప్రత్యేకంగా బోదించించి.

3 ఈనె మో పక్కెరె తల్లా తీతు గ్రీసు దెసొతా ఈనన్నా సున్నతి పొందిమాసి బులి కేసే తాకు బలవంతం కొరిలానింతె.

4 క్రీస్తు యేసురె అముకు కలిగిలా స్వతంత్రముకు కనిపెట్టికిరి, అముకు బానిసలుగా కొరితె దిగితందుకు, రహస్యంగా కపట సహోదరులునె ప్రవేసించినె.

5 సువార్త సత్యం మార్పు నీకుంటా, తొముకు పైటికైలా పనికిరి రొయితందుకు తొం మొజిరి రొమ్మాసి బులి తంకె సంగరె అమె గుట్టె గడియన్నా ఏకీబవించిలానింతో.

6 ఈనె నాయకులుగా బచ్చిగిల్లాలింకె మీ కొయిలా సందేసాలుకు మార్పునె కిచ్చి కొరిలానింతె. నే నాయకునె గొప్పులింకాక ఈనె తంకె మెత్తె ముక్కం నీ. పురువు మనమరొ పొదరె రూపు దిగిని.

7 ఈనె సున్నతి పొందిలా యూదునెకు బోదించితె పురువు పేతురుకు క్యాకిరి ఒప్పుకొయిసా, సాకిరాక సున్నతి నాపొందిలా పొదరెలింకు బోదించితందుకు మెత్తె ఒప్పుకొయిసి బులి తంకె గ్రహించినె.

8 బుల్సే, సున్నతి పొందిలా యూదునెకు అపోస్తులుడుగా రొయితందుకు పేతురుకు సామర్ద్యం దిల్లాటాక, అన్యమనమానెకు అపోస్తులుడుగా రొయితందుకు మెత్తంకా సామర్ద్యం దీసి.

9 నాయకులుగా నా తల్లా యాకోబు, పేతురు, యోహాను బుల్లాలింకె పురువు మెత్తె అనుగ్రహించిలా ప్రత్యేకమైలా పైటికి జనికిరి, అమె అన్యమనమానెకాక నీకుంటా, సున్నతి పొందిలాలింకంకా అపోస్తులులుగా తమ్మాసి బులి కొయికిరి, తంకు సంగరె పాలిబాగస్తులైతే గుర్తుగా తంకె బత్తోకైలా అత్తోనుకు మో సంగరె, బర్నబా సంగరె దీసి.

10 తంకల్లా బీదలింకెరొ అవసరాలు తీర్చిమాసి బులికిరాక కోరినె. సాకిరి కొరితందుకాక మీ ఆసక్తి కలిక్కిరి అచ్చి బులి కొయిసి.

పాలు పేతురుకు విమర్శించువురొ

11 ఈనె పేతురు, అంతియొకయకు అయిలబెల్లె సెయ్యె తప్పు కొరిసి గనక మీ తాకు మో అంపరె కొయించి.

12 కైంకిబుల్సే, యాకోబు పక్కరె తీకిరి కుండెమంది నాఅయిలా అగరె సెయ్యె పొదరెలింకె సంగరె కద్ది కైలీసి. తంకె అయిలాబెల్లె సున్నతి పొందిలాలింకు డొరికిరి పొచ్చుకు తైకిరి పొక్కు బాజేసి.

13 తల్లా యూదులంకా తా సంగరె మిసిజేకిరి కపట ఏసం పొగ్గిచ్చె. బర్నబా అంకా తంకపంట ఏసం వల్లరె మోసమైజేసి.

14 తంకె సువార్త సత్యంకు సల్లాంతె బులి, మీ దిక్కిరి సాబ్బిలింకగరె పేతురుసంగరె, “తూ యూదుడుగా తైకిరంకా

యూదుడువనికిరి నీకుంటా, అన్యుడువనికిరి జీవించిలబెట్లె, పొదరెలింకెనె యూదునెవనికిరి జీవించిమాసి బులి క్షేంకి బలవంతం కొరిలీను?” బులించి.

విస్వాసం వల్లరె యూదునె పొదరెలింకె రక్షించబొడివురొ

15 అమె జొర్నొతీకిరి యూదునెమాక ఈనె, “అన్యమనమానెరె పాపోనె” నింతొ.

16 మనమ యేసు క్రీస్తురె విస్వాసం రొగ్గువురొ వల్లరాక పురువు నీతిమంతుడుగా తీర్చుసి ఈనె, దర్మసాస్త్రం ద్వారానీ. నే సంగతి జనిలా అమ్మంకా దర్మసాస్త్రంరొ పైటీనె వల్లరె నీకుంటా క్రీస్తు వల్లరె విస్వాసం ద్వారా పురువు ద్వారా నీతిమంతునెగా తీర్చు పొందితందుకు యేసు క్రీస్తురె విస్వాసం రొగ్గించొ. దర్మసాస్త్రంకు సంబంధించిలా పైటీనె వల్లరె కేసే నీతిమంతుడు బులి తీర్చు పొందినింతె నీనా.

17 ఈనె, పురువు అముకు క్రీస్తురె నీతిమంతునెగా తీర్చిమాసి బులి కుజ్జితన్నుగా అమె పాపోనెగా దిగదెన్నే, క్రీస్తు పాపముకు సేవకుడెసినా? సాకిరి కొయినాసి.

18 మీ పొక్కదిల్లాంచకు ఇంకా బందినే మెత్తె మియ్యాక అపరాదిగా కొరుగుంచి నీనా.

19 మీ ఈనె, పురువు కోసం జీతె, దర్మసాస్త్రం వల్లరె దర్మసాస్త్రం ద్వారా మొరిజేంచి.

20 మీ క్రీస్తు సంగరంకా సిలువ మొర్నొ పొందిగించి. ఇంక జీతల్లాట మియ్యి నియ్యి, క్రీస్తాక మో బిత్తరె జీలీసి. మీ ఉంచినె దేరె జీతల్లా జీక మెత్తె ప్రేమించికిరి, మో కోసం తాకు సెయ్యాక ఒప్పుగించిగిల్లా పురువురొ పో అంపరె తల్లా విస్వాసం వల్లరాక.

21 మీ పురువురొ క్రుపకు నిరర్థకం కొరిని. నీతి దర్మసాస్త్రం వల్లరె సాద్యమైనె క్రీస్తు మొరిజివ్వరొ అనవసరమాక నీనా.

3

దర్మసాస్త్రం పైటినె ఇంక విస్వాసం

¹ తెలివినీలా గలతీయులింకె, తొముకు మోసం కొరిలాట కేసే? సిలువకు పొగిబొడిలాట పనికిరి యేసు క్రీస్తు తొం అంకినె అగరె దిగిపించించొ నీనా!

² తొం ద్వారా మీ గుటె తెలిసిగిమ్మాసి బులిగిల్లించి. సడ కిడబుల్నే, దర్మసాస్త్రంకు సంబందించిలా పైటినె వల్లరె ఆత్మకు పొందిసోనా నీనే విస్వాసం సంగరె? సునువురొ ద్వారా పొందిసోనా?

³ తొమె ఎత్తో బుద్ధి నీకుంటా అచ్చొ? అగరె పురువురొ ఆత్మ సంగరె మొదలుదీకిరి, ఉంచినె దేసంగరె పరిపూర్ణులైవొనా?

⁴ ఎత్తో కొస్తొనె పొడ్లాంచల్లా సుచ్చాటాకనా? సడానల్లా సుచ్చరాక జోసినా?

⁵ ఆత్మకు తొముకు అనుగ్రహించికిరి, తొంబిత్తరె అద్బుతానె కొరిపించితల్లాట, దర్మసాస్త్రంకు సంబందమైల పైటినె వల్లరెనా నీనే విస్వాసం సంగరె సునువురొ వల్లరె కొరిపించిలీసినా?

⁶ అబ్రాహాము, “పురువుకు నమ్మిసి సడాక తాకు న్యాయంగా బచ్చిగీసి.”

⁷ సడుకాక, విస్వాసం రొగ్గిల్లాలింకాక అబ్రాహాము సంతానం బులి తొమె తెలిసిగిమ్మాసి.

⁸ పురువు విస్వాసం ద్వారా యూదునెనీలాలింకు న్యాయంగా తీర్చిమి బులి లేకనమురె అగుంతాక దిక్కిరి, తొ ద్వారా “మనమానల్లా ఆసీర్వదించబొడివె బులి అబ్రాహాముకు సువార్త అగుంతాక ప్రకటించిసి.”

⁹ ఈనె విస్వాసం సంబందులాక విస్వాసంగల్లా అబ్రాహాము సంగరంకా ఆసీర్వదించబొడివె.

¹⁰ దర్మసాస్త్రం విధించిలా పైటినెకు సంబందించిలాలింకల్లా సాపం తొల్లచ్చె. క్లెంకిబుల్నే “దర్మసాస్త్రగ్రందంరె రాసికిరితల్లా విదులల్లా

కొరితండుకు నిలకడగా నీలా ప్రతీమనమ సాపగ్రస్తుడు” బులి రాసికిరచ్చి.

11 *దర్మసాస్త్రం వల్లరె కేసైనా పురువు అగరె నీతిమంతుడు బులి తీర్పుబొడిసి బుల్లా సంగతి స్పష్టమాక. క్షెంకిబుల్నే “నీతిమంతుడు విస్వాసం వల్లరె జీవో.”

12 దర్మసాస్త్రం విస్వాస సంబంధమైలాటనీ గని నడరొ నియమానెకు ఆచరించిలాట నడవల్లరాక జీవించువో.

13 †ఆత్మ గురించి ఈలా వాగ్దానం విస్వాసం ద్వారా అముకు మిల్లాపనికిరి, నడుకాక, “మాను ఉంపరె యాలబొడిలా ప్రతీమనమ సాపగ్రస్తుడు” బులి దర్మసాస్త్రంరె రాసికిరచ్చి.

14 అబ్రాహాము పొందిలా ఆసీర్వచనం క్రీస్తు యేసు ద్వారా అన్యమనమానెకు కలిగితండుకు, క్రీస్తు అముకోసం సాపమైకిరి, దర్మసాస్త్రంరొ సిక్కుతీకిరి అముకు చొడిపించిసి.

దర్మసాస్త్రం ఇంకా వాగ్దానం

15 మో జట్టుకారీనె, మనమ రీతిగా కొతలగిలించి; మనమానె నిర్ణయించిలాట ఈనెను నడ స్తీరపరిచిలా తర్వాతరె ఇంకజొనెకేసే నడకు మరిపీనారె, నడకు కిచ్చి మిసినారె.

16 అబ్రాహాముకు తా సంతానముకు పురువు వాగ్దానాలు దీసి. సెయ్యె బడేలింకు గురించి బుల్లాపనికిరి, తో పిల్లానుకు బులి నా కొయికిరి జొన్నె గురించి కొయిలా పనికిరాక, “తో సంతానముకు బులి కొయిసి.” “నే సంతానం క్రీస్తాక.”

17 ‡మీ కొయిలాట కిడబుల్నే, చారసోయింపరె తిందొస్ట బొచ్చురోనె యీలా తర్వాతరె అయిల దర్మసాస్త్రం, పురువు అగుంతాక స్తీరపరిచిలా నిబంధనకు పిట్టిపీని. నడరొ వాగ్దానంకు వ్యర్థం కొరిని.

* 3:11 రోమా 1, 7, హబక్కు 2, 4 † 3:13 ద్వితీ 21, 23 ‡ 3:17 నిర్గమ 12, 40

18 కీసే వారసత్వం దర్మసాస్త్రం ద్వారా కలిగిలాపనికిరి ఈనె, ఇంక వాగ్దానము నా ఈలపనికిరాక. ఈనె పురువు అబ్రాహాముకు వాగ్దానము వల్లరాక వారసత్వం అనుగ్రహించిసి.

19 సాకిరైనే దర్మసాస్త్రం కైంకి? కాకోసం ఈనె సే వాగ్దానం కొరిసో సే సంతానం అయిలెత్తెజాంక నడ అమలురె అచ్చి. నడ మొజిమనమ ద్వారా దేవదూతానె సంగరె నియమించిసి.

20 మొజిరోమనమ అచ్చిబుల్నే జోనుకాక నీ గని, పురువు జోన్నాక.

దర్మసాస్త్రంమురో ఉద్దేశం

21 దర్మసాస్త్రం పురువురో వాగ్దానాలుకు వ్యతిరేకంనా? నీ. ఈనెమాను దర్మసాస్త్రం జిపించిగలిగిలాటైనె, నడవల్లరాక నీతి కలిగిత.

22 ఈనె యేసు క్రీస్తు వల్లరె విస్వాసం ద్వారా కలిగిలా వాగ్దానం విస్వసించిలాంకు అనుగ్రహించితె లేకనము సొబ్బిలంకు పాపంరె బందించిసి.

23 విస్వాసం పొదరెనాపొడిలాబెల్లె విస్వాసం ప్రత్యక్షమైలావరకూ, అమె దర్మసాస్త్రంకు మాత్రమాక పరిమితమైకిరి నడరో చెరరె అచ్చి.

24 ఈనె పురువు అముకు విస్వాసం ద్వారా నీతిమంతునెగా కొరికిరి క్రీస్తు పక్కు సలిపించితె, దర్మసాస్త్రం అముకు ప్రాదమిక బోదకుడుగా అచ్చి.

25 ఈనె విస్వాసం పొదరకు అయిసి గనక ఉంచినె ప్రాదమిక బోదకుడు తొల్లె తన్నింతో.

26 యేసుక్రీస్తురె విస్వాసం వల్లరె తొమల్లా పురువురో పిల్లనె యికిరచ్చి.

27 క్రీస్తురె బాప్టీసం పొందిలా తొమల్లా క్రీస్తుకు పిందిగిచ్చి.

28 యాండ్రె యూదుడు బులి గ్రీసుదెసొట బులి నీ, దాసుడు బులి స్వతంత్రుడు బులి నీ. మొడ్రపో తిల్లాపిల్ల బులినీ, యేసుక్రీస్తురె తొమల్లా గుట్టెకిరచ్చి.

29 * తొమె క్రీస్తుకు సంబంధించిలాల్లింకైనే, అబ్రాహామురొ పిల్లానైకిరి, వాగ్దానం ప్రకారం వారసులైకిరిచ్చొ.

4

1 ఈనె మీ కొయిలాట కిరబుల్నే, వారసుడు సొబ్బిటికి కర్త ఈకిరితన్నెనూ పిల్లాసొ ఈకిరి తల్లెత్తెకలో తాకు దాసుడుకు కే బేదమునీ.

2 బో ద్వారా నిర్నయించిలా దినొ అయిలజాంక సెయ్యె సంరక్కుకులురొ, గ్రుహనిర్వాహకునెరొ ఆదీనరె తాసి.

3 సాకిరాక అమంకా పిల్లానైకిరి తల్లెబెల్లె లోకనంబందమైలా మూలపటోనుకు లోబోడికిరి దాసులైకిరి అచ్చొ.

4 ఈనె కలో పరిపూర్ణమైలాబెల్లె పురువు తా పోకు పొడిదీసి. సెయ్యె మనమగా మొట్టకు జొర్నైకిరి యూదునెరొ దర్మసాస్త్రం తొల్లె జీసి.

5 అమె పుసిగిల్లాపోనె ఈవాసిబులి, దర్మసాస్త్రముకు లోబోడికిరి తల్లెలింకు చొడిపించితె దర్మసాస్త్రముకు లోబోడిలాటఈసి.

6 నడుకాక తొమె పురువురొ పోనె ఈకిరి అచ్చొ గనక “*అబ్బా, బో” బులి డక్కిలా తా పోరొ ఆత్మకు పురువు అం మనుసూనెబిత్తురుకు పొడిదీసి.

7 ఈనె తు ఇంక దాసుడు నీ పోఆక. పో ఈనె పురువు ద్వారా వారసుడు.

పాలు గలతీయులు కోసం ఆలోసించువురె

8 సే కల్రె ఈనె తొమె పురువుకు నాజనికిరి, సొత్తాక పురువునె నీలాలింకు దాసులైకిరి అచ్చొ,

9 ఈనె ఉంచినె తొమె పురువుకు జనిలాలింకె, ఇంకా ప్రత్యేకించికిరి పురువు తొముకు తెలిసిగిచ్చి గనక బలహీనమైలాంచ, నాపైటికైలా మూలపైటినేపు కైంకి జెల్లిసొ? ఇంకా సడానుకు బాసీనలుగా తమ్మాసిబులిగిల్లోనా?

* 3:29 రోమా 4, 13

* 4:6 అరామికు బసారె అబ్బా బుల్నే నాన్నా బులి అర్థం

10 తొమె దినోసుకు, మసోసుకు ఉత్సవకలోనుకు, బొచ్చురోసుకూ ప్రత్యేకంగా ఆచరించిలీసాపని.

11 తొం గురించి మీ పొడిలా కొస్తూ వ్యర్థమైజోసికివోబులి తొం గురించి డొరిజల్లించి.

12 మో జట్టుకారీనె, మీ తొం పనాట యించి గనక తొమ్మంకా మోపనాలికె ఈవాసిబులికిరి తొముకు బతిమాలిగిల్లించి. తొమె మెత్తె అన్యాయం కొరిలానింతొ.

13 కైంకిబుల్నే అగరెసారి మెత్తె దేరెనాబొల్లరినన్నా, తొముకు సువార్త ప్రకటించించి బులి తొముకు తెలుసు.

14 సెత్తెలె మో దేరె నాబొల్లెరోన్నన్నా సడకు దరికిరి తొమె మెత్తె త్రునీకరించిలానింతొ, నిరాకరించిలానింతొ గని పురువురొ దూత పనికిరి, క్రీస్తుయేసు పనికిరి మెత్తె అంగీకరించిసా.

15 తొమె కొయిగిల్లా దన్యత కిరైసి? వీరైనే తొం అంకినె కడికిరి మెత్తె దీవేతో బులి తొం గురించి సాక్సం కొయిపారి.

16 మీ తొముకు సొత్తో కొయిలందరె సత్తుయించినా?

17 తంకె తొం మేలు కోరికిరి ఆసక్తి సంగరె వెంటాడిలాలింకెనింతె. తొమ్మాక తంకు పొచ్చాడె జెమ్మాసిబులికిరి తొముకు పొదురుకు మొకిదీతె దిగిలీసె.

18 మీ తొం పక్కరె తల్లబెల్లెమాత్రమాకనీకిరి కెబ్బుకు బొల్లెవినయొనెరె ఆసక్తిగా రొవురొ బొట్టాక.

19 మో సన్నిపిల్లానె, క్రీస్తు స్వరూపము తొం బిత్తరె దిగదిల్లజాంక తొం గురించి ఇంకామెత్తె ప్రసవవేదన కలిగిలీసి.

20 తొం గురించి మెత్తె కిచ్చితోచిలీని. మీ ఉంచినాక తొం మొజుకు అయికిరి ఇంగుటెపనికిరి తొం సంగరె కొతలగిమాసిబులిగిల్లించి.

హాగరు చార రొ ఉదాహరణ

21 దర్మసాస్త్రముకు లోబొడికిరి తమ్మాసిబులిగిల్లాలికే, మెత్తెకోండి. తొమె దర్మసాస్త్రముకు సునిలీసానింతొనా?

22 దాసి వల్లరె జొనె, స్వతంత్రురాలు వల్లరె జొనె, దీలింకె పోనె అబ్రాహాముకు కలిగినె బులికిరి రాసికిరి అచ్చినీనా?

23 ఈనె దాసివల్లరె జొర్నైలాట దే రీతిగా జొర్నైసి. స్వతంత్రురాలుకు జొర్నైలాట వాగ్దానం ద్వారా జొర్నైసి.

24 ఏ సంగతీనె అలంకార రూపముగా కొయిపారొ. ఏ తిట్టలింకె దీట నిబందనలైకిరి అచ్చె. తాండ్రె గుట సీనాయి పర్వతొకు సంబందించికిరి బానిసత్వంరె రొయితందుకు పిల్లానుకు బేయిసి. యెయ్యె హాగరు.

25 ఏ హాగరు అరేబియా ప్రాంతంరె తల్లా సీనాయి పర్వతమాక. ప్రస్తుతం ఉంచినె తల్లా యెరూసలేము నడరొ పిల్లానెసంగరంకా బానిసత్వంరె అచ్చి. గనక నే నిబందన నడకు పోలికగా అచ్చి.

26 ఈనె ఉంపరె తల్లా యెరూసలేము స్వతంత్రముగా అచ్చి. నడ అముకు మా.

27 నడకు

“పిల్లానుకు నాబేయిలా గొడ్డింటా ఆనందించు,”

బేయితె బొత్తానె నాయిలంటా, బొట్ట దొందరానె దొందరా;
క్యాకిరిబుల్నే గొయిత రొల్లాటరొ పిల్లానెకన్నా

గొయిత నీలాటరొ పిల్లానె బడేలింకె అచ్చెబులి రాసికిరచ్చి.

28 ఉంచినె తొమె మో జట్టుకారీనె, అమంకా ఇస్సాకువనికిరి వాగ్దానం వల్లరె జొర్నైలా పిల్లానైకిరచ్చి.

29 సెత్తెలె దే ద్వారా జొర్నైలాట ఆత్మ ద్వారా జొర్నైలాటకు క్యాకిరి హింసించిసో ఉంచినంకా సాకిరాక జరిగిలీసి.

30 ఈనె యెడ గురించి లేకనం కిరకొయిలీసి? “దాసికి తా పోకు గొడ్డిదె దాసి పో స్వతంత్రురాలురొ పో సంగరె వారనుడు ఈకిరి తన్ని.”

31 నడవల్లరె మో జట్టుకారీనె, అమె స్వతంత్రురాలురొ పోనాక గని దాసిరొ పోనెనింతొ.

5

క్రీస్తురె విడుదల

1 స్వతంత్రంగా రొయితందుకాక క్రీస్తు అముకు చొడిపించిసి. గనక, తొమె స్తీరంగా టారికిరి, ఇంకా బానిసత్వం బుల్లా కాడితోల్లె చిక్కితెనాండి.

2 దిగోండి; తొమె సున్నతి పొందినె క్రీస్తు వల్లరె కిచ్చిప్రయోజనం నీబులికిరి పాలుబుల్లా మియ్యి తొముకు కొయిలించి.

3 సున్నతి పొందిలా ప్రతిమనమ దర్మసాస్త్రమల్లా పాటించిమాసిబులికిరి మీ యింకా గట్టిగా కొయిలించి.

4 తొబిత్తరె దర్మసాస్త్రం వల్లరె నీతిమంతునెగా ఈవాసిబులిగిల్లాళికె కేసెవో తంకె క్రీస్తుతికిరి బొత్తిగా వేరైజీకిరచ్చె, క్రువ తీకిరి పొదురుకు బాజీసె.

5 క్యాకిరిబుల్లె, అమె విస్వాసం వల్లరె న్యాయం కలుగుసిబుల్లా నిరీక్సన సంగరె ఆత్మద్వారా ఎదురు దిగిలించో.

6 యేసు క్రీస్తురె ఏకమైపురొ వల్ల సున్నతి పొందినన్నా కిచ్చినీ, నాపొందినన్నా కిచ్చినీ, ఈనె ప్రేమసంగరె ఫైటికొరిలా విస్వాసమాక ముక్కం.

7 తొమె బొల్లాక దోడిలీసా. సత్యముకు నాఅనుసరించికుంటా తొముకు కేసె ఆపిసె?

8 ఏ ప్రేరణ తొముకు డక్కిలా పురుపు కే ఆటంకము వల్లరె కలిగిలాని.

9 పులిసిల పిండి కుండె ఈనన్నా ఉండల్లా పుల్ల కొరిపివో.

10 తొమె కెత్తెమాత్రం వేరేగా ఆలోసించినింతొబులికిరి ప్రబువురె తొం గురించి మీ గట్టిగా నమ్మిలించి. తొముకు కలవరం లోగిలాట కేసైనను సరాక సెయ్యె తగిల సిక్స అనుబవించుసి.

11 మో జట్టుకారీనె, సున్నతి పొందిమాసిబులి మీ ఇంకా ప్రకటించితన్నే ఉంచినెకంకా క్షైకి హింసించబొడిలించి? సిలువకు గురించి అబ్యంతరముకు సున్నతి కడిపిలీసి నీనా?

12 తొముకు అబ్యంతరం పరిచిలాళికె తంకు తంకెక అనిపిగివురొ బొల్ల.

13 మో జట్టుకారీనె, తొమె స్వతంత్రులుగా రొయితె పురువు తొముకు డక్కిసి. ఈనె సే స్వతంత్రముకు దేరొ ఆసానెకు ఆదారం నాకొరిగీకిరి, ప్రేమ సంగరె జొనుకు జొనె సేవ కొరిగిండి.

14 దర్మసాస్త్రమల్లా “తో పనికిరాక తో పక్కారెలింకు ప్రేమించు” బులికిరి గుట్టె ఆజ్ఞరె సంపూర్ణమైకిరి అచ్చి.

15 ఈనె తొమె జొనుకు జొనె కమిడిగీకిరి కైపీనె జొను వల్లరె జొనె బొత్తిగా నసించుజెవ్వోకివో దిగ్గునొండి.

ఆత్మ ఇంకా దే సంబంధమైలాట

16 మీ కొయిలాట కిరబుల్నే ఆత్మద్వారా సలుగునొండి. నెత్తెరె తొమె దేరొ ఆసానెకు నెరవేర్చినింతో.

17 దే ఆత్మకు ఆత్మ దేకు యిరోదంగా జింకుతోసి. ఎడానె గుటకు గుటె వ్యతిరేకంగా అచ్చె. గనక తొమె కిర కొరివాసి బులి నిచ్చుయించిగిచ్చి సడానె కొరినింతో.

18 తొమె ఆత్మ సంగరె సలిగిన్నే దర్మసాస్త్రముకు లోబొడిలాలింకెనింతో.

19 దేకు సంబందించిలా కార్యానె స్పష్టంగా అచ్చె. సడానె కిరబుల్నే; జారత్వము, అపవిత్రత, కామవికారం,

20 విగ్రహారాదన, మాయకొతానె, ద్వేషం, కలహము, ఈర్ష్య, రగ్గో, మత్సరమునె, క్రోధమునె, కక్సానె

21 బేదమూనె, విమతానె, అసూయానె, గోల కొరిలా నచ్చొ గిత్తీనె ఎడానల్ల. ఎడానె గురించి మీ అగరె కొయిలా పనికిరాక ఎడానుకు కొరిలాలింకె పురువురొ రాజ్యోకు జెన్నారె బులికిరి తొముకు స్పష్టంగా కొయిలింబి.

22 ఈనె ఆత్మ పలాలు కిరబుల్నే; ప్రేమ, ఆనందం, సమాదానం, దీర్ఘసాంతం, దయాలత్వం, బొట్టతనం, విస్వాసం,

23 సాత్వికము, ఆసానిగ్రహం. ఏటానెపనాంచకు విరోధమైలా నియమము కిచ్చీనీ.

24 క్రీస్తుయేసు సంబంధీనె దేకు, సడరో దురాసానెకు సిలువ పొగిపీసె.

25 అమె ఆత్మ ద్వారా జీకిరి తన్నె సే ఆత్మ ద్వారా సలిగిమ్మా.

26 జోనుకు జోనె అహంబావం నీకుంటా కొలీనెనీకుంటా అసూయ నీకుంటా రొమ్మండి.

6

జొనొ బారాలునె జోనె బరించిగిండి

1 మో జట్టుకారీనె, తొం బిత్తరె జోనె కే తప్పునాకొరుకుంటా మిలిజిన్నే తొం బిత్తరె ఆత్మసంబందమైలాలింకె కేసన్నా, సాకిరి తప్పునాకొరుకుంటా బొల్లమనుసు సంగరె సే మనమకు బొల్లబట్టుకు దన్నెమాసి. తొమ్మంకా సడకు నాలొంగుకుంటా తాసా.

2 జోనురో బారముకు జోనె బరించిగిండి. సాకిరి కొరికిరి క్రీస్తు నియమముకు పూర్తిగా నెరవేర్చొండి.

3 కేసన్నా కిచ్చీనీకుంటాత్తెకిరి తాకు సెయ్యాక గొప్పిటబులికిరి బచ్చిగిన్నే, తాకు సెయ్యాక మోసం కొరిగిల్లీసి.

4 ప్రతీ మనమ సెయ్యె కొరితల్లా పైటికి పరీక్షించికిరి దిగ్గిమ్మాసి; సెత్తెలె పొదరెలింకె విసయంరెనీకిరి తావల్లరాక తాకు అతిసయం కలుగుసి.

5 ప్రతీ మనమ తా గొబిరి సెయ్యాక బరించిగిమ్మాసినినా?

6 వాక్కు ఉపదేసము పొందిలా మనమ ఉపదేసించిలాటకు బొల్లపదార్థాలుబిత్తరల్లా బాగం దిమ్మాసి.

7 మోసమైతెనా, పురువుకు ఎక్కిరించినారొ; మనమ కే విత్తోనె జల్లినే సే పచ్చాక కట్టుసి.

8 క్యాకిరిబుల్నే తా దేరొయిస్తప్రకారంగా విత్తోనె జల్లిలాట తా దేదీకిరి నాసనం బుల్లా పచ్చకు కట్టుసి, ఆత్మద్వారా విత్తోనె జల్లిలాట ఆత్మద్వారా నిత్యజీవం దిల్లా పచ్చకు కట్టుసి.

9 అమె మేలు కొరిలాటబిత్తరె నా యిసిగ్గీకుంటా రొమ్మండి. అమె నాలిసిజీకుంటా మేలు కొర్నే, తగిల కల్రె పచ్చ కట్టుంచొ.

10 ఈనె అముకు కలొ మిల్లాబెల్లల్లా సొబ్బిలింకూ, మరీ ముక్కంగా సంగమురొ విస్వాసునెకు మేలు కొరిమండి.

అకరు డొరొ కొయివురొ సుబాలు

11 మో సొంత అత్తొనె సంగరె తొముకు కెత్తొ బొట్టక్కరాలు సంగరె రాసిలించొ దిగొండి.

12 దే వినయంరె బొట్లె దిగదిమ్మాసిబులికిరి కోరిగిల్లాలింకె కేసెవో, తంకె క్రీస్తు సిలువ వినయంరె హింస నాపొడుకుంటా రొయితందుకాక సున్నతి పొందిమాసిబులికిరి తొముకు బలవంతం కొరిలీసె.

13 ఈనె తంకె సున్నతి పొందిలాలింకె ఈనన్నా దర్మసాస్త్రముకు పాటించినింతె; తంకె తొ దే వినయంరె గొప్పానె కొయిగినితె కోసం తొమె సున్నతి పొందిమాసిబులి కొరిలీసె.

14 ఈనె అం ప్రబువైల యేసుక్రీస్తు సిలువ వల్లరె తప్ప మరి కేటగురించి అతినయించువురొ మెత్తె దూరుయివాసి; సడవల్లరె మెత్తె లొకొ, లొకొకు మియ్యి సిలువ పొగ్గించొ.

15 నువస్త్రుస్తి పొందువుర్రాకగని సున్నతి పొందువురె నాపొందువురె కిచ్చీనీ.

16 యే పద్దతి చొప్పురె చలిలాలింకల్లా బుల్నే పురువురొ ప్రజానెకు సాంతి క్రుప కలిగిమాసి.

17 మీ యేసురొ గుర్తునె మో దేరె పిందిగించి గనక ఎట్టెతీకిరి కేసె యీనెనూ మెత్తె హింసించితేనాండి.

18 అన్నబయినె అప్పబొయినె, అం ప్రబువైలా యేసుక్రీస్తు క్రుప తొ సంగరల్లా తమ్మాసి. ఆమేను.

సాత్త్వ పురుషురొ పవిత్రొ కొత
The Holy Bible in the Reli language of India: సాత్త్వ
పురుషురొ పవిత్రొ కొత (Bible)

copyright © 2023 The Word for the World International and Relli Translation Samiti, Vishagapatnam, Andra Pradesh

Language: Relli (Reli)

Contributor: The Word for the World South Asia

సాత్త్వ పురుషురొ పవిత్రొ కొత
నో నిబంధన, 2023

The New Testament in Relli Language

The Word for the World International

This translation is made available to you under the terms of the Creative Commons Attribution Share-Alike license 4.0.

You have permission to share and redistribute this Bible translation in any format and to make reasonable revisions and adaptations of this translation, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

If you redistribute this text, you must distribute your contributions under the same license as the original.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2025-06-26

PDF generated using Haiola and XeLaTeX on 26 Jun 2025 from source files dated 26 Jun 2025

46416fd4-e5d1-555f-9e24-8bbc94e50bd9